

आकाशवाणी

खबरां -----

1. समूलचा मुलख अज्ज भारतीय संविधान दे प्रमुख रचियता बाबा साहेब भीमराव अम्बेडकर होरें गी उंदी जन्म जयंती दे मौके पर चेतते करा करदा ऐ।
2. प्रधानमंत्री नरेंद्र मोदी होरें आखेआ ऐ जे बाबा साहेब भीम राव अम्बेडकर हुंदे विचार ते सिद्धांत पिछले 11एं बरें थमां सरकार दा इक-इक कदम पर मार्गदर्शन करै करदे ना।
3. गृह मंत्री अमित शाह होरें आखेआ ऐ जे मुलखै च आंदे गेदे त्रै नमें आपराधिक कनून 21मीं सदी दे सब्बनें शा बडे सुधार ना।
4. पूरे ओडिशा च अज्ज उड़िया नमा बरा बडे मते जोश जज्वे ते उत्साह कन्नै मनाया जा'रदा ऐ।
5. रूस नै संयुक्त राष्ट्र च भारत लेई स्थाई सीट दा इक बारी परतियै समर्थन कीता ऐ।
6. ते आई.पी.एल च अज्ज हुनै कोला किश चिर मगरा लखनऊ जायंट्स दा मकाबला चिन्नेई सुपर किंग्स कन्नै होग।

<><><><><><>

Ambedkar Jayanti

समूलचा देश अज्ज भारतीय संविधान दे मुख निर्माता डॉ. भीमराव अम्बेडकर हुंदी 134मीं जयंती पर उनेंगी श्रद्धा दे फुल्ल भेंट करा करदा ऐ। इस मौके दैसै च नेकें कार्यक्रमें दा सरिस्ता कीता गेदा ऐ। राष्ट्रपति द्रोपदी मुर्मू, उपराष्ट्रपति जगदीप धनखड़, प्रधानमंत्री नरेंद्र मोदी, लोकसभा अध्यक्ष ओम बिरला, राज्यसभा दे उपसभापति हरिवंश, राज्यसभा च सदन दे लीडर जे.पी नड्डा, राज्यसभा च

विपक्ष दे लीडर मल्लिकार्जुन खडगे, लोकसभा च विपक्ष दे नेता राहुल गांधी, केंद्री मंत्रियें ते सांसदें सने आम लोकें अज्ज संसद भवन परिसर च डॉ. बी.आर अम्बेडकर हुंदी प्रतिमा पर फुल्ल चाढ़िये उनेंगी भावें भरोची श्रद्धांजलि दिती।

<><><><><><>

PM-Haryana

प्रधानमंत्री नरेंद्र मोदी होरें आखेआ ऐ जे राश्ट्र अज्ज बाबा साहेब होरें'गी शरदांजलि देआ करदा ऐ ते उन्दे आदर्श सरकार दा म्हेशां रहनुमाई करदे रौहडन। हरियाणा दे हिसार च इक्क अवामी जलसे गी संबोधित करदे होई प्रधानमंत्री होरें आखेआ जे जंदे 11 बरें थमां बाबा साहेब दा जीवन उंदी जद्दोजहद ते उंदा अमर स्नेआ सरकार दी जात्तरा दा आधार रेआ ऐ। श्री मोदी होरें आखेआ जे हर दिन लैते गेदा फैसला ते बनाई गेदी हर नीति डॉ. अम्बेडकर हुंदे आसेआ दस्सी गेदी दिशा बक्खी इक्क गैं ऐ। बाबा साहेब होरें'गी शरदांजलि दिंदे होई प्रधानमंत्री होरें आखेआ जे उंदी जयंती दलितें, बगौरे ते हाशिये पर रवा करदे लोकें लेई देयाली आहला लेखा ऐ। उनें गलाया जे उंदे मंत्र मताबक कम करदे होई श्री कृष्ण जी दी जन्म भूमि थमां भगवान राम दी जन्मभूमि अयोध्या तगर हवाई सेवा रम्भ होई गेई ऐ। प्रधानमंत्री होरें वक्फ कनून च कीते गेदे हाल दे बदलावें दा बचा करदे होई आखेआ जे एहदे कन्नै गरीब मुसलमानें गी लाह होग ते जनजातीय जिमी दी हिफाजत होग। उनें आखेआ जे वक्फ कनून पर चर्चा नेकां मुस्लिम विधवाएं आसेआ सरकार गी खत लिखने मगरा रम्भ होई। श्री मोदी होरें आखेआ जे वक्फ कनून च बदलाव कन्नै मुसलमानें दे शोषण पर रोक लगगोग ते गरीब पच्छड़े दे मुसलमानें गी उंदे हक थ्हांगन। एहदे शा पैहले प्रधानमंत्री होरें हिसार ब्हाई अड्डे पर अयोध्या लेई कारोबारी डोआरी गी रवाना कीता ते नमीं टर्मिनल ईमारत दा नींह पत्थर रक्खेआ।

<><><><><><>

Madaviya

युवा कार्यक्रम ते खेल मंत्री डॉ. मनसुख मांडविया होरें युवाएं गी अपील कीती ऐ जे ओहू विकसित भारत दे निर्माण च योगदान देने आस्तै डॉ. भीमराव अम्बेडकर हुंदी समानता, न्याय ते भाईचारे दे सिद्धांतें थमां प्रेरणा लैन। डॉ. मांडविया पटना दे ऐतिहासिक गांधी मैदान च मेरा भारत थमां सरबंधत युवाएं ते स्वयंसेवकें गी संबोधित करा रदे हे। इस मौके पर उनें युवा कार्यक्रम ते खेल मंत्रालय आसेआ आयोजित जय भीम जात्तरा गी झंडी दस्सियै रवाना कीता। उनें आखेआ जे देश दे युवाएं गी भारती संविधान दी भावना दा सम्मान ते अनुपालन करना लोडचदा ऐ।

<><><><><><>

Ambedkar-Day

देश दे सब्बनें राज्यें ते केंद्र शासित प्रदेशें च बी अज्ज अम्बेडकर जयंती मते उत्साह कन्नै मनाई जा रदी ऐ। दिल्ली दियां मुख्मन्त्री रेखा गुप्ता होरें बी संविधान सदन दे केंद्री कक्ष च बाबा साहेब भीमराव अम्बेडकर होरें गी पुष्पांजलि भेंट कीती। कश्मीर कोला लेइयै कन्याकुमारी तगर ते गुजरात कोला लेइयै अरुणाचल प्रदेश तगर अज्ज हर सरकारी दफ्तर दे अलावा कई गैर सरकारी संगठनें बी इस मौके पर भारत रत्न अम्बेडकर होरें गी श्रद्धा-सुमन भेंट कीते।

<><><><><><>

Ambedkar Jayanti-J&K

भारतीय संविधान दे मुख्म निर्माता डॉ. बी.आर अम्बेडकर हुंदी 134मीं जयंती जम्मू-कश्मीर च बी जोश जज्बे कन्नै मनाई गेई जित्थे सियासी ते समाजी गुटें सने बक्ख-बक्ख लोकें उनेंगी भावें भरोची श्रद्धांजलि भेंट कीती। मुख्म समारोह अम्बेडकर चौक जम्मू च लगा जित्थे देशभक्ति गीतें ते प्रेरक भाशणें बश्कार बाबा साहेब होरें गी शरदांजलि दितती गेई। उपराज्यपाल मनोज सिन्हा ते मुख्म मंत्री उमर अब्दुल्ला होरें बी डॉ. बी.आर अम्बेडकरी हुंदी जयंती दी पूर्व संज्ञा लोकें गी शुभकामनां दित्तियां। उपराज्यपाल होरें अपने स्नेह च आखेआ जे भारतीय संविधान दे मुख्म निर्माता बाबा साहेब होरें भारत दे भविक्ख गी आकार देने च महत्वै आहली भूमिका निभाई ते साहूदे राश्ट्री जीवन ते

समाज पर कदे नेई मिटने आहली छाप छोड़ी। मुखमंत्री उमर अब्दुल्ला होरें अपने स्नेह च आखेआ जे डॉ. अम्बेडकर होरें अपना सारा जीवन दबोए-लतडोए ते बेगौरे तबकें गी उब्बडा चुक्कने च लाई दित्ता।

<><><><><><>

Shah-Laws

गृह मंत्री अमित शाह होरें आखेआ जे त्रै नमें आपराधिक कनून 21मीं सदी दे सब्बनें शा बड्डे सुधार न ते सरकार देसै दी न्याऽ प्रणाली गी लोकें पर केंद्रित ते वैज्ञानिक बनाने दी कोश्ट करा करदी ऐ। अज्ज नमीं दिल्ली च अखिल भारतीय फोरेंसिक विज्ञान शिखर सम्मेलन गी संबोधित करदे होई श्री शाह होरें आखेआ जे सरकार सब्बनें गी समें पर न्याऽ दोआने ते न्याऽ कन्नै राजी होने बक्खी कम्म करा करदी ऐ। उनें गलाया जे देसै दी आपराधिक न्याऽ प्रणाली गी निगार करने च फोरेंसिक साइंस मती कारी दी ऐ। श्री शाह होरें आखेआ जे विजन फोरेंसिक साइंस दे समें पर न्याऽ ते मते मामलें च सजा दोआना मुमकन नेई ऐ। तोआई, केंद्री मंत्री अमित शाह होरें आखेआ जे मोदी सरकार नशीले पदार्थें दी तस्करी करने आहलें दे नेटवर्क गी तगडेयाई कन्नै खत्म करा करदी ऐ। इक्क सोशल मीडिया पोस्ट च श्री शाह होरें आखेआ जे देसै दियां एजेंसियें अंतरराष्ट्रीय समुंद्री सरहद कश 1 ज्हार 800 करोड़ मुल्ल दे 300 किलो नशीले पदार्थ जब्त कीते न।

<><><><><><>

Gujrat-Narcotic

तटरक्षक बल नै गुजरात आतंकवाद निरोधक दस्ते कन्नै मिलियै 1800 करोड़ रपे दी 300 किलोग्राम कोला मती मेथम फेटामाइन जब्त कीती ऐ। खुफिया जानकारी दी विनाह पर अभियान चलाया ते अंतरराष्ट्रीय समुंद्री बन्ने कश इक समुंद्री ज्हाजै गी रोकेया। ज्हाजै च सोआर लोक एहू नशीला पदार्थ उत्थे समुंद्रै च सुट्टियै आपूं नस्सी गे।

<><><><><><>

CBI-Arrest

केंद्री जांच ब्यूरो सी.बी.आई नै डी.बी स्टाक कंसल्टेंसी घोटाला मामले च गुवाहाटी एक्सिस बैंक दे साबका ब्रांच मैनेजर पुष्पजीत पुरकास्त्य ते डिब्रुगढ़ दे संदीप गुप्ता गी गिरफ्तार करी लैता ऐ। सीबीआई मूजब पुरकास्त्य नै कथित तौरा पर निवेशकें गी पैहा लाइयै बड़ा मता सूद दोआने दा लारा ते लालच देइयै ते डी.बी स्टाक कन्नै मिलियै गैर कनूनी तौरा पर शैल पैहा किट्टा कता हा। फर्म दे प्रमुख एजेंट दे रूपै च संदीप गुप्ता नै कोई साड्डे 300 कोला मते लोकें कोला पैहा लोआया।

<><><><><><>

PNB-Scam

भारत चा नस्सियै बाहर उठी गेदे हीरे दे कारोबारी मेहुल चोकसी गी बेल्जियम पुलसै गिरफ्तार करी लैता ऐ। एह गिरफ्तारी पंजाब नेशनल बैंक दोआर धोखाधड़ी मामले च होई ऐ। 65एं बरें दे चौकसी गी सीबीआई दी गुजारश ते मुम्बई दी इक अदालत दे 2 गिरफ्तारी वरंटें दी बिनाह पर गिरफ्तार कीता गेआ ऐ। पंजाब नेशनल बैंक च साड्डे 13 ज्हार करोड़ रुपें दे दोआर धोखाधड़ी आहले मामले च चोकसी मुख आरोपी ऐ। ओ अपनी घरै आहली प्रीति चोकसी कन्नै बेल्जियम दे शैहर अंतरीय च रवा करदा हा। इसै मामले च सह आरोपी ते चोकसी दे भतरिए नीरव मोदी गी बी लंदन थमां भारत लेई आने दी मेद कीती जा रदी ऐ। एह दवै पंजाब नेशनल बैंक घोटाले दी जानकारी सामने औने दे किश हफ्तें पैहले गै जनवरी 2018 च भारत थमां फरार होई गे हे। केंद्री खजाना राज्यमंत्री पंकज चौधरी होरें चोकसी दी गिरफ्तारी गी इक बड्डी उपलब्धि दस्सेआ ऐ। प्रधानमंत्री नरेंद्र मोदी होरें पैहले गै आक्खी दित्ते दा ऐ जे देसै दी संपत्ति गी लुट्टने आहले कुसै बी आदमी गी बख्शेया नेई जाग।

<><><><><><>

Odisha-New Year

समूलचे ओडिशा च अज्ज ओडिशा नमां बरा बडे मते उत्साह कन्नै मनाया जारदा ऐ। उत्थूं दे हर क्षेत्र दे लोक महा विशूबा संग्रांद ते पना संग्रांद गी मनाने लेई अज्ज बड्डुलै किट्टे होए दे अपने रीति रिवाजें

मताबक नमें बरे दी शुरूआत कीती। इस मौके उत्थूं दे रिवायती गीत, नाच, व्यंजन ते होर सांस्कृतिक कार्यक्रम इनें आयोजनें दा मुख आकर्षण रेह।

<><><><><><>

LG-Industry

उपराज्यपाल मनोज सिन्हा होरें अज्ज कठुआ च सुपीरियर पॉलीमर इंडिया प्राइवेट कांफ्रेंसिंग रायं उद्घाटन कीता। उनें गलाया जे इस परियोजना दा रम्भ होने कन्नै मकामी अर्थ बवस्था ते रोजगार पर सकारात्मक असर पौग। श्री सिन्हा होरें आखेआ जे जम्मू-कश्मीर दा निर्माण ढांचा बदा'रदा ऐ ते औद्योगिक विकास गी समर्पित अज्जै आहली परियोजना आत्मनिर्भर जम्मू-कश्मीर दे मिशन गी रफ्तार देग। उपराज्यपाल होरें दोहराया जे प्रधानमंत्री नरेंद्र मोदी ते गृहमंत्री अमित शाह हुंदी रहनुमाई च अस्स जम्मू-कश्मीर च औद्योगिक क्षेत्र दी तरक्की लेई बचने बज्जे दे आं। ध्यानजोग ऐ जे 75 करोड़ रुपें दी रास पूंजी कन्नै स्थापित इस इकाई कन्नै रोजगार दे नेकां मौके पैदा होइन।

<><><><><><>

OP-Chatroo

किश्तवाड़ दे छात्रू च आतंकवादियें दी तलाश सरबन्धी कार्रवाई अज्ज 6में रोज बी जारी ऐ कीजे घनें जंगलें च तपाशी अभियान लगातार चला करदा ऐ। जंदी रातीं इलाके च विस्फोट ते गोलीबारी होई ही। इस टाकरे च अजें तोड़ी सुरक्षाबलें 3 आतंकवादियें गी मारी मकाया ऐ। टाकरे आहली थाहरा दा एम-4, ए.के 47 समेत हथियार ते असला बरामद होआ ऐ।

<><><><><><>

Russia-India

रूस नै संयुक्त राश्ट्र सुरक्षा कौंसल च स्थायी सीट लेई भारत दी कोशशें दा परतियै समर्थन कीता ऐ।
उनें एब्बी मेद प्रगट कीती ऐ जे दौनें मुल्खें बश्कार आने आहले बरें च आपसी भ्याली लगातार बददी
रौहण। कूटनीति सरबन्ध कायम होने दे 78 बरे पूरे होने पर टैलीग्राम च सांझा कीते गेदे इक्क स्नेह च
यस दे विदेश मंत्रालय नै इस मौके पर भारत गी ममारखां दित्तियां न। रूस नै भारत कन्नै सरबन्धत ते
दोस्ती मित्री आहले रिश्ते होर तेजी कन्नै मजबूत होने दा भरोसा जताया ऐ।

<><><><><><>

Hockey-Team

हॉकी इंडिया नै अज्ज पर्थ हॉकी स्टेडियम च 26 अप्रैल कोला लेइयै 4 मई तगर होने आहली हॉकी
प्रतियोगिता लेई आस्ट्रेलिया दे दौरे पर जाने आहली 26 मिम्बरी भारती महिला हॉकी टीम दी
घोषणा करी दित्ती ऐ। 5 मैचें दी श्रृंखला दे पैहले 2 मैचें च भारत दा मकाबला आस्ट्रेलिया ए कन्नै होग
जेदे मगरा सीनियर आस्ट्रेलियाई टीम कन्नै त्रै मैच खेडु जांगन। जून म्हीने च होने आहले एफआईएच
प्रो. लीग 2024-25 च टीम दे यूरोप दौरे शा पैहले एहू प्रतियोगिता भारत दी तैयारी दे मामले च
फैसलाकुन साबत होग।

<><><><><><>

IPL

आई.पी.एल च हुनै कोला किश चिर मगरा ठीक साडु 7 बजे लखनऊ दे एकाना क्रिकेट स्टेडियम च
चिन्नेई सुपर किंग्स दा मकाबला लखनऊ सुपर जायंट्स कन्नै होग। अजे तोहड़ी खेडुं दे 6 मैचें चा 4
मैच जित्तियै लखनऊ अंक तालिका च चौथे नम्बरै पर ऐ जिस्सलै के चिन्नेई सुपर किंग्स नै 6एं चा
शडा 1 मैच गै जित्ते दा ऐ ते ओहू अंक तालिका च सब्बनें शा हेठले नम्बरै पर ऐ। एहदे शा पैहले कल
खेडु गेदे दऊं मुकाबलें च रायल चैलेंजर्स नै राजस्थान रायल्स गी 9 विकेटें कन्नै हराया हा जिसले जे
मुम्बई इंडियन्स नै दिल्ली कैपिटल्स पर 12 रन्ज दी जित्त हासल कीती ही।

<><><><><><>

Archery-World Cup

अमरीका दे फ्लोरिडा च तीरंदाजी विश्व कप 2025 प्रतियोगिता च भारत दे धीरज बोम्मदेवरा नै चांदी दा तगमा जित्तेआ ऐ। धीरज नै मर्दे दे व्यक्तिगत रिकर्व मकाबले च एन्ड्रेस टेमिनो मेडिएल गी 6-4 कन्नै हराया। धीरज दा इस प्रतियोगिता च एह दुआ तगमा ऐ। इस जित्त दे कन्नै गै भारत दी तीरंदाजी विश्व कप च कुल 4 तगमें हासिल होए जिंदे च इक सुन्ने दा, इक चांदी दा ते 2 कैह दे तगमे शामिल न ते भारतीय टीम मैडल सूचि च चौथे नम्बरै पर रेही। एहदे शा पैहले तरूण दीप राय ते अतनू दास कन्नै धीरज नै रिकर्व पुरुष टीम मकाबले च चांदी दा तगमा जित्तेआ हा।

<><><><><><>

Ladakh-Sports

लद्दाख च दूसरा सलाना खेड उत्सव अज्ज गोमा कारगिल मैदान च शुरू होआ। एहदा सरिस्ता पैरवान-ए-विलायत आसेआ कीता गेआ ते एहदे च ग्राएं ते महल्लें दे नौजवानें हिस्सा लैता। इक्के ध्याड़े दे इस आयोजन च रस्साकशी, लगोरी, 100 मीटर लम्मी द्रौड़, गोला सुट्टने, नेजा सुट्टने ते इस चाल्ली दिएं होर केई खेडुं गी शामिल कीता गेदा हा जिंदे च नौजवानें बधी चढियै हिस्सा लैता। एह कार्यक्रम मकामी बक्ख-बक्ख समुदाएं बश्कार मेल-मलाप बधाने, नौजवानें गी अपनी खेडु छमता गी दर्शाने दा मौका देने ते तंदरूस्ती बारै लोकें गी जागरूक करने लेई कीता गेदा हा। लोकें इस आयोजन लेई सरकार दा आभार प्रगट कीता।

<><><><><><>